

Selskabit pisortanit pigineqartut Kalaallit Nunaanni inuussutissarsiornermi ineriartortitsinermik sammisaqartut ataatsimut kattutsinneqarnissaat pillugu Naalakkersuisut suliniuteqarnissaannik peqquteqarnissaannut aalajangiiffigisassatut siunnersuut.

(Inatsisartunut ilaasortat, Finn Karlsen, Siverth K. Heilmann, Knud Kristiansen, ATASSUT)

Akissuteqaat

(Inuussutissarsiornermut Suliffeqarnermullu Naalakkersuisoq)

Inuussutissarsiornerup aaqqissuuneqarnerata siuarsarneqarnerani paasinanerulersitsinermik pilersitsinissaq Naalakkersuisut erseqqissumik siunertaraat, selskabit pingasut, Kalaallit Nunaanni Takornariartitsinermi Inuussutissarsiornermilu Siunnersuisooqatigiit (GTE), Greenland Development (GD) aamma Greenland Venture (GV) maanna agguarneqarsimasunut naleqqiullugu ajornaannerusumik iluarsinikkut. Inuussutissarsiornermik siuarsaannermi aaqqissuussinerup sunniuteqarnerusup pilersinneqarnissaa siunertarineqarpoq, suliassanik nunatsinni nunarsuarmioqatigiinnilu inuussutissarsiornerup ineriartortinneqarnerani suliassat malitsigisaat naammassissallugit ilisimasanik piginnaasanillu naammattunik pigisaqartunik.

Kalaallit Nunaanni inuiaqatigiit ukiuni kingulliunerusuni allanngornernik malunnaateqarluartunik nalaataqarsimapput – minnerunngitsumik inuussutissarsiornermik sammisaqarnerup iluani. Nunat allamiut Kalaallit Nunaanni aningaasaliissuteqarnissaminnut soqutiginninnerulernerannut malunniutaavoq, Kalaallit Nunaat angalaffissatut siunniunneqarnerata aallunneqarnerulerneranut, uuliasiornerup aatsitassarsiornerullu iluanni aningaasarsiornikkut periarfissanut nutaanut siunniussinernut. Allannguutit tamakku Kalaallit Nunaanni suliffeqarfinnut periarfissanik misilitassatullu unammilligassanik nutaarluinnarnik kinguneqarput.

Nunap immikkoortuini kinguneqarluartumik periarfissat pisariaqartitat pilersinnissaat Naalakkersuisuni akisussaaffigisatsitut isigaarput. Nunap immikkoortuini ineriartortitsinissamut pilersaarummi suliniuteqarnermi periarfissat sumut tutsinneqassanersut periarfissaqarfiusut pisariaqartitaqarfiusullu qitiutinneqarneranni pisortat inuussutissarsiornermi suliniutinut nutaanut sapinngisamik pilersitsisussaasutut aallussipput. Kommunit 18-iusut kommunerujussuarnut sisamanut allanngortinneqarneranni inuussutissarsiornermi siuarsaannerup allanngortinneqarneranut nunap immikkoortuinut tunngatillugu tulluusaanissaq pissusissamisoortumik pisariaqalersitsisimavoq. Taamaalilluni pissusissamisoorpoq selskabit GTE, GD aama GV, maanna inuussutissarsiornermi siunnersuinermik ineriartortitsinermillu sammisaqartut erseqqinnerusumik misissuiffigineqartariaqarput, Kalaallit Nunaanni suliffeqarfiit qanoq ilisukkuat pitsaanerpaamik ikiorsinnaassagaat suliniutit periarfissaat paasissallugit aningaasarsiornikkullu iluanaaruteqartinnissaannut periarfissanut nutaanut ikaarsaariartissallugit.

Inuussutissarsiornerup siuarsarnissaa pillugu Naalakkersuisut tamatigoortumik oqallinneqarnissaa kissaatigaat, selskabit immikkut taaneqartut aallullugit oqallinnermut saatsinnagit. Naalakkersuisut isumaqanngillat naalakkersuinermik sammisaqartut aamma naalakkersuisunut ilaasortat suliassarigaat suliffeqarfiit ataasiakkaat sammisaqarfigisaat akuliuffigissallugit. Selskabit

ingerlanneqarnerat eqqarsaatigalugu siulersuisuisa aalajangissavaat, pisortaasullu isumagissallugu, taamaaliornikkut paasinartumik tunngaviit anguneqassapput, suliffeqarfimmi ingerlatsinikkut aalajangerneqartut naalakkersuinikkut sunniuteqarfiit immikkoortillugit.

Nunap immikkoortuini ineriartortitsinermi pilersaarummik suliaqarneq Kalaallit Nunaanni inuussutissarsiornermik siuarsaanikkut aaqqissuussinerup tamakkiisup pissusissamisoortumik qitiutissavaa. Taama suliaqarnermi inassutigisaasut pilersaarutillu pilersaaruteqarnermi anguniagaasut pisariaqartitat tulluarnissaat pingaartinneqassapput. Aaqqissuussinikkut ilusissaa inaarutaasumik aalajangiiffigissallugu maannangaq oqaatigissallugu siusinaalaarpoq.

Ilisimatitsissutiginnaavara siunnersuummik matuminnga akuersaartumik Naalakkersuisut suliniuteqareersimmata.

Siunnersuut taamaalillugu itigartinneqarnissaanut Naalakkersuisut inassuteqarput.